

■ COLUMNA

Igl castitg turpagius

DAD ANDREA LUZIUS RASSEL

Nus Svizzers eassan loschs da blears progress a prestaziuns da la nosssa teara. Ascheia eassan nus cuntaints da viver an egnna teara pulit siira, tagnagn ad òlt la raspunsevla dad parsunala ad eassan cunzunt ear parsvadius c'igl noss traffic public segi egn digls migliers piert segl antier mund.

L'anda passada e'gl gar tagieu egn schabetg ca sberla ampo las nosssas parsvasiuns. Egnna buaba da tschentg ons c'e ida cuagl bus a Schaffhausen cun la sia sora da diesch ons. Ellas san noua prender igl bus a noua puspe ir or digl bus. La sora da diesch ons à egn abunamaint pigl antier on, la sora ple giuvna à nign



bigliet. An Svizra van unfants acumpagnieus da carschieu gratuit cuagl mieds digl traffic public. Nus eassan ear loschs da quella purschida. Mo la giuvna da diesch ons cuagl bigliet valevel e betga carschida, quegl fuss ella per an dus ons. Gl'artetgel 600 digl urden da traffic metta la vegliadetgna da 12 ons sco cunfegn dad easser carschieu ni

carschida. La buaba da tschentg ons sto pagliear egn castitg da 100 frànchs par ir sainza bigliet.

Las scolas an Svizra fan gràndas stentas da motivar igls unfants da vagnir a scola a pe near ear cuagl mieds da traffic publics. Geniturs ca magnan lur unfants a scola cuagl auto metan an prievegl igls cunsculars da lur unfants a impedeschan igl svilul da lur unfants da vagnir ple independents a ple siirs a cumpetents partizipants agl traffic.

Scha manaschis digl traffic public casteian unfants an tala maniera, e quegl nut c'egn saves easser losch, mo zunt turpagius!



FOTO M. MATHIUE

Il blauet verdargientà (Lysandra Cordion)

Il lavendel en curtin carmala el mument neutier pliras tschittas. Ina dallas bialas ei quei «Bläuling», en quei cass il masculin. La sort feminina porta il vestgiu en brin. La tschitta metta ils ovs (pilpli) vid il stumbel dil treifeagl-cavagl (Hufeisenklee), nua quels passentan gl'unviern. La primavera neschian las larvas che, suenter haver consumau las plantas, vivan

en stretga simbiosa cun sorts furmiclas. La tschitta ha sviluppau ina strategia maligna per cuglienar las furmiclas. Sco larva producescha ella in secret dultsch che carmala neutier il pievel. Cun il tric acustic d'imitar differentas ramurs dallas furmiclas meina la raupa en erur las guardias, aschia che quellas ein dil meini ch'ellas portien ina da lur atgna sort egl

igniv. Il parasit ei arrivaus en la collonia giavischada, nua ch'el vegn uss pervesius atras sur meins ed era schurmegiaus. Perencunter regala la raupa allas furmiclas vinavon il liquid dultsch. Da miez zercladur entochen fin d'uost astgan ins admirar il davos stadium digl insect, la tschitta sgola.

Martina Mathiuet

■ 100 ONNS MUSEUM D'ART GRISCHUN

Cudesch da maletgs «Luna. Ina notg en il museum»

(cp) Sco adina fa Luna ses tur da controlla tras il museum. Ma questa notg èsi tut auter. Il nov cudesch da maletgs dal museum d'art dal Grischun cumpara a chaschun dal giubileum da 100 onns ed accumpogna grond e pitschen sin in viadi aventurus tras il museum. A chaschun da la festa da giubileum «100 onns museum d'art dal Grischun» che ha lieu sonda, ils 24 d'avust 2019, vegn il cudesch da maletgs preschentà al public.

Cuntegn

La guitadra Luna sa renda sin ses tur tras il museum e chatta largias sin ils maletgs da la collecziun dal museum d'art dal Grischun. Ella auda ramurs singularas e scuvra fastizs insolits. Qua sa schluita insatge sperasvi, là audan ins a batter alas. En il museum èsi stgir ed uschia na vesa Luna betg che quai èn ils animals che bandunan las ovras d'art e che sa reuneschan en il museum. En la sala gronda chatta ella la finala las parts mancantas dals maletgs. Ils animals èn s'unids là per festivar

l'anniversari da Luna. Luna ed ils animals sautan e fan festa fin ch'i cumenza a far di. Als emprims radis dal sulegl realiseschan ils animals ch'il di cumenza, ed uschia festinan els enavos sin lur maletgs, nua ch'els paussan durant il di.

Concept

L'idea per il cudesch da maletgs è vegnida sviluppada da tschintg studentas da la Scola auta da pedagogia dal Grischun en il rom da lur emna da studi «Erlebnis Kunst». Ils grafichers Theres Jönger, André Meier e Franziska Kolb han elavurà vinavant il project ensemen cun las intermediaturas d'art dal museum e concepì il cudesch da maletgs cun l'illustratura Martina Walther.

Ils texts derivan da Vincenzo Todisco. L'uniun grischuna d'art ha accumpagnà e sustegnì finanzizialmain il project.

La publicaziun per uffants fin diesch onns è redigida en las linguas chantunales tudestg, rumantsch e talian. Il cudesch da maletgs cun faschettas e cun fa-

nestrins misterius è concepì sco cudesch per preleger a chasa u en scola e po er vegnir duvrà per preparar u per elavurar posteriurmain ina visita dal museum.

«Luna. Ina notg en il museum» è vegnì edì dal museum d'art dal Grischun e cumpara en la Chasa editura rumantscha.

A chaschun da la festa da giubileum «100 onns museum d'art dal grischun», ils 24 d'avust 2019, vegn il cudesch da maletgs «Luna. Ina notg en il museum» preschentà al public.

Vernissascha dal cudesch

Sonda, ils 24 d'avust 2019 a las 17.30 ha lieu la vernissascha dal cudesch ensemen cun Doris Caviezel-Hidber, presidenta da l'uniun grischuna d'art, ed Anita Capaul, manadra da la Chasa editura rumantscha

La guitadra Luna prelegia da ses cudesch da maletgs a las 14.00/16.00/17.00 en l'atelier da l'intermediaziun d'art. Da las 10.00 fin las 19.00 pon ins ir sin ils fastizs da la guitadra Luna en moda creativa.

■ NOVITADS WWW.RTR.CH

Chatschader observa pèr da lufs cun trais pitschens

A Sursaisa ha in chatschader observà l'emna vargada in pèr da lufs cun almain trais chagniels. Tenor Adrian Arquint, il manader da l'uffizi da chatscha e pestga, pon ins ir da quai or ch'ils lufs observads furman il quart triep en il chantun Grischun. Sper il nov triep observà a Sursaisa ha l'uffizi da chatscha gia confermà il triep dal Beverin cun set chagniels ed il triep enturn Falera cun tschintg chagniels. Tiers il triep dal Calanda è quest onn fin ussa betg vegnì constatà novs chagniels. Il dumber total da lufs en il chantun vegn schazegà il mument sin 30–35 animals.

Paja minimala

Per emploiads da chasa duaja la paja minimala vegnir augmentada. Il departament d'economia da pretenda in augment dad 1,6%. Uschia survegnessan per exempel persunas che gidan da nettegiar en l'avegnir almain 19 frans e 20 raps per ura. Dapi il 2011 ston privats cun emploiads da chasa far in contract da lavur. Questa reglamentaziun duai vegnir prolungada per trais onns.

Nov da diesch èn cuntents

La maioritad dals Svizzers e da las Svizras van gugent a lavurar. En ina retschertga han 87% inditgà dad esser cuntents u fitg cuntents cun il job – quai è circa uschè bles sco l'onn passà. Differenzas datti dentant aifer las branschas. Tar l'industria da construcziun e la construcziun da maschinas è s'augmentada fitg ferm la cuntentientscha. Pli pauc cuntents èn ils Svizzers e las Svizras en il secur da bancas ed assicuranzas.



La ruta passa er tar ils Flüaseen tranter Giuf ed il Stallerberg.

FOTO RTR

Park Ela Trek fa concorrenza a trecs canadais

El duess daventar in project da pionier: Il Park Ela Trek. 19 etappas duessan en l'avegnir passar tras las Alps. I duess esser in'alternativa per las purschidas da trekking tras il Canada e la Nova Ze-

landa, uschia l'idea dals promoturs dal Parc Ela. gi che vul far l'entira ruta dal Park Ela Trek sto esser fit: Dapli che 200 kilometers ston vegnir pigliads sut ils pes en quellas 19 etappas.


■ L'AURA

Bletsch e grisch

Situaziun generala: La Svizra schea a l'ur d'ina aria che sa chatta sur la Penisla Iberica. Quella maina current umid ed instabil vers la Svizra.

Oz: En il Grischun central, en il nord dal Grischun ed en Surselva l'entir di grisch, bletsch, temporals ed uradis. Temperaturas en il nord da 19 grads. En il sid ed en l'Engiadina nagina aura da stad, cun plover savens. Temperaturas en il sid da 24 ed en l'Engiadina Ota entuorn 17 grads.

Prognosa: Mesemna en il Grischun central ed en il nord plitost bletsch e stgir. En il sid ed en l'Engiadina l'entir di surtratg, umid e grisch.



CARICATURA L. FLEPP